



Inatsisartunut ilaasortaq Randi Vestergaard Evaldsen, Demokraatit  
/maani

## **Inissianik iluarsaassinissaq pillugu § 37 naapertorlugu apeqquteqaammut akissut**

30-06-2017  
Sags nr.: 2017 - 14112  
Dok. nr. 21451823

Asasara Randi Vestergaard Evaldsen

Aallarniutigalugu apeqquternut Inatsisartut suleriaasianni § 37 naapertorlugu nassiussannut, qujavunga.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

### **Apeqqut 1. Inissiat attartortittakkat eqqarsaatigalugit Naalakkersuisut pingaarnertut qanoq pilersaaruteqarpat inissianik attartortittakkanik iluarsaassinissaq pillugu?**

**Akissut:** Namminersorlutik Oqartussat nuna tamakkerlugu ilaqutariinnut arlalinnut inissiaataannut immikkoortumut pilersaarutit Naalakkersuisut suliaaraat. Immikkoortunut pilersaarutini taakkunani ilaatigut piffissap allassimasup iluani inissiat sorliit iluarsaanneqassanersut, atorsinnaassusaat sivitsortinneqassanersut imaluunniit isaterneqassanersut inassuteqaatit atuarneqarsinnaapput.

Taamaalilluni immikkoortunut pilersaarutit Namminersorlutik Oqartussanut toqqammavissaalluarput. Kommunit inissiat attartortittakkat tiguppasigit, immikkoortunut pilersaarutit aamma kommuninut toqqammavissaassapput, taamaalillutik taakkua inissiat iluarsaannissaannut pilersaarusiorsinnaassallutik.

### **Apeqqut 2. Iluarsaassinerit ataasiakkaat pilersinnagit Naalakkersuisut eqqarsaatigissanerlugu nutaanik sanaartoraanni imminut akilersinnaanerussanersoq?**

**Akissut:** Aap, inissiap iluarsaannissaa imminut akilersinnaangippat, tamatuma allatut pitsaanerusumik iliuuseqarfigineqarnissaa ugartorneqassaaq.

### **Apeqqut 3. Iluarsaassinerit ataasiakkaat ataatsimoortumut pilersaarummut ilaappat? (Assersuutigalugu eqqumiippoq Radiofjeldimi altanit iluarsaanneqarniarmata peqataanik illup saqqai aaqqissutillannguarnagit)**

**Akissut:** Aap, iluarsaassinerit tamarmik pingaarnersiulluni tulleriinnilersuineq malillugu pisarput, aammalu Aningaasanut Inatsimmi aningaasaliissutaasut iluanni.

Paasissutissiissutigineqarsinnaavoq, Qapiarfusaami blok 11-17-imi aneerasaartarfiit iluarsaanneqarnerat, najugaqartunut isumannaallisaaneq qulakkeerniarlugu ingerlanneqarmat. Ilaatigut Qapiarfusaami iluarsaassinissamut, atorsinnaassusaannik sivitsortitsinissamut imaluunniit isaterinissamut inassuteqaatit tamarmiusut immikkoortunut pilersaarutini atuarneqarsinnaassapput.

Soorunami Naalakkersuisut eqqummaariffigaat aningaasaliisutit iluini isumatusaartumik sulisoqarnissaa, taasa aningaasanik asuli atuisoqarnissaa siunertaangilaq,

akissussaassusilimilli aningaasat sulisinneqarnissaat Naalakkersuisut  
pingaartikkatsigu.

Silamik pissuteqartumik, kiisalu iluarsaassinerup suussusaa annertussusaalu  
pissutigalugit, iluarsaassineq ukiut pingasut ingerlaneranni ingerlanneqassasoq  
naatsorsuutigineqarsinnaavoq.

Inussiarnersumik inuulluaqqusillunga



Erik Jensen